

引痘要畧



南海邱浩川原本

引痘要畧

福州鄭奮揚肖巖重訂

聖天子國祚萬歲
萬壽無疆

捐資姓名並印刷費附列於後

前印疹書剩存台伏貳拾貳元

至誠堂印送壹千本該伏貳拾伍元

林有慶印送壹千本該伏貳拾伍元

劉希泗捐伏壹拾元

昇餘錢庄捐伏伍元

菊孫氏捐台伏伍元

非曰能捐台伏伍元

雙江園捐台伏叁元

以上併共台伏壹百元

印刷引痘要畧肆千本每本扯價二十五文的伏壹百元兩楚

重訂引痘要畧自序

泰西佈種牛痘之法早爲寰球所公認其法巧其術神可以保種卽可以強國不僅衛生一端矣吾國自前清嘉慶十年南海邱浩川由澳門返鄉卽以是法傳授粵人且著引痘畧以傳世由是風行海內迨道光間醴陵黃之擅重刊是書復增四瀆一穴以配三焦其於生理學固亦不背然西洋先哲能創點臂引痘之手術尙未識此處爲手少陽之脉絡無他未讀靈素之書知所當然而不知其所以然耳攷內經有云少陽屬腎腎上連肺蓋一陽生氣發起坎中腎中之陽卽少陽之相火種牛痘者刺消爍清冷淵以牛痘之苗從少陽絡入腎引先天命門之胎毒復上達

於少陽故其毒絕不至波及他臟以比古昔吹鼻之法較
爲優長今春天時不正痘疫幾至蔓延老大幼小之人有
已種洋痘而復出天花者人人疑惑以爲洋痘不足貴不
知外洋種痘每人一生必經種痘兩三次始慶萬全乃吾
國嬰兒僅種一次以後卽不復種致胎毒未拔淨絕一感
天行疹厲之氣安得不重出而傳染乎余惻然傷之因檢
出引痘畧重加訂定集貲印送俾天下之愛憐兒女者玩
味是書深信無疑不惜小費而多種數次卽可免重出天
花之弊保養成人同躋壽域爲父母者豈不愉快也哉
中華民國六年歲次丁巳暮春之月

福州鄭奮揚肖巖識於袖海廬

時年六
十有九

一是書南海邱氏原名引痘畧茲將醴陵黃氏撮要叅訂故改稱之曰引痘要畧

一原書各家序文前後倒置有乖體例故移綴之

一前清吳榮光中丞題贈詩竟刊在各序中間且只有一首無關學術故割愛不登

一黃氏撮要所採銅人正面背面二圖及手足陰陽十二經脈似與引痘無涉故刪去只登手少陽三焦所屬消燦清冷淵四瀆三穴考

一末附東洋綿貫氏及上海陳魯珍氏之說以資種痘者之研究幸勿輕視

目錄

重訂自序

原本序文

四篇

引痘撮要

按經取穴論

邱氏引痘說

引泄法

出痘時宜辨

方藥備用

附陳魯珍牛痘說明書

例言 五則

西洋種痘論

點穴圖說

西洋點痘推原說

留養苗漿說

度苗法

出痘後須知

附東洋綿貫氏之天花談

原序

順造物之生成易補天地之缺憾難嬰兒之患天花乎損益其甚者不存五六古之醫者惟待其毒之既發而治之宋以來始有取痘苗繫於鼻孔之法後人效之可謂善於所感事捷而功鉅矣然獨失十一二於千百未能操券而十全也我朝德化涵濡躋民仁壽薄海內外驚慄偕徠嘉慶元年外洋醫人憫其國中嬰兒遽遭此厄盡心講求得牛痘之法於毒之未發先行引之不擇天時不煩禁忌不延醫不服藥以此流傳隣近諸國如響斯應迨嘉慶十年四月由小呂宋舟載嬰兒遞傳其種以至澳門予時以賁在澳聞其事捷不勞而取效甚大也以身試之其法果驗泊行之家人戚友亦無不驗者於是洋行好善諸君以予悉此屬於會館專司其事歷十數寒暑凡問途接踵而至者累百盈千無有損失夫嬰兒之無不出痘者天也治之有效有不效者人也嘗恭讀醫宗金鑑云痘感於得病之後而種痘則施於未病之先正痘治於成病之時而種痘則調於無病之日既無諸症夾雜於其中復有善方引導於其外然則牛痘之理原包於種痘諸法之中雖種之法有不同而其爲善方引導於外則一也予

素不知醫亦未嘗以此取人絲毫之利其所以力行此者則以出痘者人所同患慈幼者人有同情苟可以去險履平避危就安少可有濟於人何敢或懈於已第念足不出國門行不離鄉曲而痘之患處處有之此法予既得之最先行之無悞何妨筆之於書爰取其法之歷驗者條述之並繪爲圖以質諸世仁人君子知有此法相與講明而流布之俾嬰兒不罹天花之厄共嬉游於光天化日中也不亦慈幼者之所同快哉

南海邱熹浩川氏識

吳序

濟世之道莫先於醫醫述多途莫險於痘稽種痘之說上古未有自漢代伏波將軍征武陵蠻從壺口進兵軍中遂染此疾厥後班師毒氣傳入中國諸醫調治皆據內經痛癢瘡瘍屬心火之一言爲治痘之要領十損八九及至宋仁宗時丞相王旦初生諸子俱死於痘後老年生一子名素欲爲出痘招集天下諸醫有能深明治痘之法及著書立說者重金酬謝諸醫皆言不敢深明於痘川人聞其求醫甚殷乃爲延請天姥仙娘現身說法取痘苗絮於鼻孔旬日之外告厥成功嗣是相傳三橋善女痘症日漸通行然或有感天氣而發者或有取

苗吹入鼻孔而發者順則易治逆則難醫甚至瀕於危亡而勿可救藥俾天下
赤子罹此害者不可勝計儒竊憫之壬午冬清邑族君天池延嘉禾邑庠生李
翹楚爲孫童種痘適儒醫業是邑聞其述不勞而效甚大一日邀遊界溪市寓
聚談之次論及此事始云揀選佳苗剔取鮮漿披點人身兩臂消燦夾白清冷
淵穴所按日期與吹鼻無異尋其源則來自西洋傳自邱熹效捷功深名公鉅
卿多有投贈族戚好善諸公以儒習此宜廣行其術時儒懷疑觀望而不敢妄
進焉癸未春清邑點種通行因再爲之反覆詳觀果於所刺之處紅暈鮮活墳
起如痘以痘証書果如其言種種吹染全無復出夫乃嘆荷聖朝洪休引外洋
之奇方傳流中國躋人生於壽域矣於是謀之族君恭寅同學是術傳點千百
小兒俱有真驗第虛版存東粵路途迢遙題詠方書難於傳遍今幸本省大人
深仁厚澤愛民如子刊版通行將千載流傳永爲萬民攸賴敢不捧稿恭呈而
詳爲之序

衡山吳珍儒

唐序

古無點痘法也自南海邱浩川得洋醫之傳而其法始盛行於世往余在京師

見引痘新書所載引泄諸說與世所行吹鼻法迥異心竊疑焉隨見士大大家
出痘率用此法因屬業是術者至宅中按其部位種之時都下天行驟發害最
烈點痘之家卒無患而余向之疑者始信爰攜是書歸里擬廣其傳未果歲壬
午毘陵譚君服思以名諸生走粵東盡得其傳率其徒楊煦生王月川鄧復亨
至省垣依法引種顏其局曰體仁而事屬創聞信之者尠因爲白諸同人行之
而驗者無算竊謂是舉也有三善焉順其自然小兒不以種痘爲苦一也種後
卽不復發得遂爲父爲母之願二也不計利不假方藥於無力之家尤便三也
三者合而保嬰之方濟世之道孰加於此哉今年春諸君重刊邱氏書而問序
於余余喜此事之信而有徵且韙其行義之勇爲能公善於人也遂書以贈之
道光癸巳仲春育菴氏唐方煦敘

溫序

自盧扁不世出善攝生者多持勿藥之說然必慎之於未病斯能百不失一余
曩在京師見安徽人來北方種痘詢其苗則來自江南多能獲效心已奇之及
歸里晤南海邱君浩川其法更捷云嘉慶初元外洋醫者試於嬰兒臂上依

穴法挑破見膜而止用薄刀取牛痘之漿傳之不數日卽出數顆如期收效永不再出嗣是以人傳人如火之傳薪無不應手而愈嘉慶十年逾重洋到粵欲傳其術人未之信獨 邱君詢得其詳驗之果效遂傳其方活人無算時方伯

曾公學使傅公先後延至署中並奏效如神方伯取義經勿藥有喜四言書扁以贈傅公亦賦詩贈之一時名流題詠幾遍余觀本草綱目見其稀痘方用白牛蝨以此蝨儕緣牛身食飽自墜用之能稀痘卽取其中有牛血耳牛蝨尙能稀痘則牛痘必稀用其苗以種宜獲十全之效理有固然無足怪者是中國人已發其端而外洋人專心致志觸類引伸亦其一長也用能順其自然不假方藥無小無大無有恐怖豈非補名醫之未備爲活嬰之妙術而能百不失一者耶余嘉 邱君之志故備書之以告來者嘉慶丁丑仲冬順德溫汝适題

西洋種痘論

痘瘡之起由來遠矣。或云自周。或云自漢。然總不越乎氤氲化醇。當構精結胎時。先天之邪火伏於臟腑。偶感天時。遂行發泄。故曰天行。天行之來。父母之心惕然矣。何也。以其夭折之多也。前人出大智慧。創爲種痘之法。預貯痘痂之純

潔堅厚者。研而爲麵。於天行未起和風甘雨之時。擇嬰兒之無疾病瘡疥疳積等症者。以紙筒裝。末吹其鼻內。或用銀簪剔取鮮漿藏於鼻中。令其氣息透入於肺。同類相招。因而洩發。天時既正。身體又健。而且未渴掘井。治之於未然。慎之於將發。刻刻提防。事事周匝。故十存其九。法至善也。然不能保其萬全者。因肺開竅於鼻。肺爲華蓋。朝百脈而覆臟腑。氣一感之。則五臟六腑之火一齊併發。毒有淺深。痘有疎密。偶一失調。故間有不救。非種之之過也。夫人不生於空桑。自不免乎出痘。然天地之大德曰生。保合太和。默默中常欲胥天下而盡登仁壽。彼嬰兒何罪。天豈忍故生斯疾。以夭折之耶。何以天花流行。殤者多而壽者寡。此非天之特降其災也。同一時行耳。其中或賦質本虛。而適逢癘氣。或身當疾病。而又遇眚災。故痘未出而已伏危機。痘一出而卽遭夭斃。本實先撥。傾者覆之。固亦事理之常。無足怪者。然此亦不過十中之一二耳。天心仁愛。斷不多也。其不須治而勿藥有喜者。則恆四五。略治而卽愈者。二三。因治而後壞者。乃竟四五焉。而嬰孩遭劫矣。此非持論之過刻也。試與之平心而論。曠觀乎天花盛行之時。其闇昧無識。貪財射利。粧模作樣。草菅人命。而不知罪孽者無

論矣。卽或淺嘗輒效。微倖成功。世所稱嶄然見頭角者。亦不過牛羊之眼。恪守師傳。旣不能因人變化。而螻蛄之虫。專泥成書。又不能隨地遷移。求其胸羅萬卷。鏡掛秦臺。用法而不羈於法。治人而不困於人。變通盡利。神而明之者。雖或不乏人。然憂憂乎其難之矣。此所以全豹未窺。垣方難洞。過於塞。則遏其勃發之機。而毒攻於內。偏於補。則犯乎實實之戒。而錮蘊於中。甚至以毒攻毒。不善其用。而潰爛肌膚。無賊引賊。胡亂而投。而本根剋伐。推其廣絡原野。坐失機宜。其流弊之禍。不至於不斃而斃。當生不生。爛額焦頭。沿街遍巷。而不止也。嗚呼。刼哉。賈生所謂可爲流涕痛哭者。此也。然操治者一悞再悞。猶復自以爲是。而諉之於天。歸之於命。夫天豈任咎耶。命豈任咎耶。蒼蒼者天。蚩蚩者氓。亦安能禁此無學無識之徒。而不爲之戕賊也。嗚呼。誰生厲階。水火兵刀。莫甚於此。有心者所以俯仰悲懷。憫童穉之無辜。而籌思乎種痘者。又何爲得乎萬全之法也。而西洋之種痘。則萬全矣。嘉慶十年。西洋啖咭喇船載痘種。並其國醫咭拿。自呂宋航海至粵。爲人種痘。據伊書所載。國醫咭拿。憫出痘之多災。見養牲之家。獨不出痘。審視其牛身起藍泡。疑其爲痘。挑取其漿。用小刀剔起小兒兩臂。

中央之皮。以牛痘之漿。裝入於內。旋出一顆。又將其漿輪流遞種。百發百中。永不再出云云。但查伊書祇圖繪種法。而未確指出其源。故於初種之時。人見其與吹鼻異。多疑以爲怪。而不知殊非怪也。特未發明其所以然耳。夫西洋之法。亦猶吹鼻之法也。而巧則過之何也。吹鼻之法。由肺引入挑臂之法。亦由肺引入。但吹鼻則獨動五臟六腑之火。故出痘或多。挑臂則於兩臂之中。獨取三焦微微動處之穴。剔起裝漿。經絡皮毛。俱屬於肺。而傳漿和血。又兼入於心內。經云諸痛瘡癢。俱屬於心。痘爲先天邪火伏之於心。彼巧莫巧於單刀直入。獨提出先天一點心火。而餘經不動。此所以獨出一顆。而奏萬全之效也。其用牛痘爲種者何。用牛性屬土。毒逢土則解。借牛之土性。以解痘之毒耳。茲有力之家。各捐菓金。以留其種。洵菩提甘露。遍滴人間也。能留其種固佳。倘萬一失傳。千萬里遠隔重洋。又何能一時飛渡耶。顧思醫者意也。牛之種可以種人。人之種亦可以種牛。當天行之時。擇痘痂之純淨堅厚者。研而爲麵。如人吹鼻種痘之法。以種無病少壯之牛。得牛之種。則可以轉而種人。似亦無不可也。但當種之時。須按正兩臂中間微微動處。卽係三焦之穴。用筆墨點定。然後輕輕用手。

斜刀挑起纖纖薄皮不可挑破肉上之膜。至令血出。則是皮毛之下。大肉之上。中隔一膜。內經所謂分肉者此也。若不從微微動處點定下針。偏左偏右。稍遠三焦之穴。則不獨不能提出先天心火。而痘不出。卽出後亦復發。此非種法之差也。特其下手種痘時之謬耳。余恐日後轉相傳授。差之毫釐。謬之千里。訛以傳訛。必至復出。遂譁然謂種法荒謬而置之不議。則辜負慈航救世之苦心。爲大可惜矣。因不揣固陋。詳爲揭焉。庶幾芻蕘一得。葑菲弗遺。於運針之時。手如握虎。點穴之際。部在秋毫。則一舉手而仰副上天大生廣生之心。一下針而遂盡世間爲父爲母之願。彌天花雨。種植無枉折之災。遍地慈雲。齟齬獲平安之福。不傷財。不勞民。至簡至易。萬舉萬全。法至善也。術至神也。惟願縉紳君子。慈淑仁人。堅其信焉。遠爲播焉。則廣種福田。同登壽域。豈不樂哉。

嘉慶二十年端陽日書於小有清虛精舍

南海黃安懷書

◎引痘撮要

痘科之流傳久矣。自昔遵用鼻苗。由肺傳肝。及脾腎相攻。相伐逆傳。命門攻出。先天伏毒。因逆攻而出。發無定處。設遇蒙頭鎖項。纏腰。以致變症叢生。調治不